

# Wrake van Ragisel


editie M. Gysseling

## bron

*Wrake van Ragisel*. In: Instituut voor Nederlandse Lexicologie (samenstelling en redactie), *Cd-rom Middelnederlands*. Sdu Uitgevers/Standaard Uitgeverij, Den Haag/Antwerpen 1998.

Zie voor verantwoording: [http://www.dbnl.org/tekst/\\_wra001mgys01\\_01/colofon.php](http://www.dbnl.org/tekst/_wra001mgys01_01/colofon.php)

© 2012 dbnl



**[Wrake van Ragisel]**

## Aar

- 1 din hi gereet vant ende trac op  
die valbrucege datse enen cloep  
jegen die starke porte gaf  
datter en groet spaen viel af
- 5 dat doende jnden casteel  
die van binnen worden en deel  
jn vare die horden desen slah  
die ridder liep vt ende sah  
heren. walewaine. gewapent staen
- 10 doe woude hi weten sonder waen  
datsi alle verraden waren  
hi riep gaet vt sonder sparen  
wapent v want ic verraden ben  
her walewain. waent dat hi hem
- 15 meer haet dan enegen man die left  
ende hi weet oec wel dat hi heft  
die jonvrowe lief vor alle die leuen  
ende sorgt dat hine sal begeuen  
ende af gaen nv te derre noet
- 20 ende dadijjt oec so wari doet  
[D]je suarte riddre waende wel wesen  
verraden sin ende es binnen desen  
gewapent. ende vt comen met geninde  
doe irst hi den ridder kinde
- 25 ouer sinen gerehten here  
doe wart hi van al sinen sere  
vtermaten wel genesen  
ende hietene willecome wesen  
ende voer an hem al met spele
- 30 done die here vanden castele  
aldus willecome hiet sin  
wart hi verblijt en luttelkin  
[D]oe sprac die ridder om ene sake  
hebbic sere tongemake
- 35 gewest sint dat ic v listen sah  
dat ic v nine dede gewah  
te vragene welc v name ware  
jc mesgreep mi oppenbare  
ende dede sodheit mar segt mi nv
- 40 vwen name here des biddic v  
alse her walewain. dit horde  
sorgt hi dat met enen worde  
die vrinscap sal jnden dar  
want hi heftene meneh jar
- 45 gehaedt. ja meer dan toter doet  
ende die jonvrowe van galistroet  
heft hi oec banderside gemint  
vor alle vrowen die hi kint  
die jegen hem dar buten lah
- 50 vele te meer hijt nv ontsah  
nohtan penst hi wast gescie  
jne logende mins namen nie  
no nv en sal dor en geen verdriet  
her ridder segt hi en sciet
- 55 noit man van mi ter gere stat  
die mi vragde ohte bat

om minen name jne seiden hem  
 ende jne wart noit no nv en ben  
 van minen name oec so milde  
 60 dat ickene jmanne secgen wilde  
 mine weser tirsten om gebeden  
 riddre dits een van minen seden  
 ende sal sin den dah dat ic leue  
 jc hete walewain. ende ben neue  
 65 s .coninc. arturs. also dit verstoet  
 die ridder spranc hi enen voet  
 vander erden hi was so blide  
 here seit hi bi onsen tide  
 en gescide noit ridder dat merkic nv  
 70 sconre aenture dane mi ende v  
 mar sider dat ic van v sciet  
 sone constic verhoghen niet  
 jn en gerewijs jc secgv tui  
 jc hadde groten anx dat mi  
 75 eneh riddre van cranken loue  
 verwonnen hadde telken houe.  
 darment vername hir jnt lant  
 so waric embermer gescant  
 mar al hebdi mi verwonnen  
 80 men salt mi niet gelahtren connen  
 want gi sijt sekerlike  
 die beste ridder van al erterike  
 bi v en verlisic niet min ere  
 des willic gode onsen here  
 85 gerne danken al mine dage  
 here nv sijt blide. want al lage  
 aldie werelt nv hir vore  
 also barade mi god ic core  
 eer v gescide te grote noet  
 90 datmen mi vor v hir sloge doet  
 god lonv dits mi wel bequame  
 nv soudic gerne oec vwen name  
 weten. also helpe mi god dat si  
 maurus die suarte ridder heetmen mi  
 95 [D]oe sprac min her. walewain.  
 her maurus men soudv vilajn  
 scelden gine stont mi jn staden  
 daric ben dus sere verladen  
 want gijt sculdeh sijt tedone  
 100 doe antwerde die ridder cone  
 here hoe soet met mi vergeet  
 jc ende min volc wi sin gereet  
 tuwen dinste wat soes gesciet  
 nv segt mi ende en heles niet  
 105 war gi seder hebt gewesen  
 ende beriht mi oec van desen  
 die sin hir buten wat si soken  
 om hen en darf v niewent roken  
 ende wanen brincki terre stont  
 110 desen ridder. es hi gewont  
 neen hi niet hi es min broder  
 mins vader kint ende mire moder  
 die met onrehte was gevaen  
 doe begondi ane slaen  
 115 ende vertelde hem vten gronde

hoe hi gevaren hadde van dir stonde  
dat hi jnt bosh van hem sciet  
jc verseit v mar en holpe niet  
en es oec en geen reht dat wetic wale  
120 tuewarf te secgene ene tale  
[A]lse her walewain. sine aenture  
die hem worden was te sure  
den suarten ridder hadde vertelt  
sprac hi her walewain. here gi selt  
125 hir binnen sin behoudenlike  
also helpe mi god van hemelrike  
v. es gereet min hulpe min raet  
hoe soet mi darna vergaet  
gi mogt wel ouer mi dar na gebieden  
130 doe hiet die ridder al sinen liden  
datse hen ten mure daden  
si gingen sonder lanc beraden  
opten mur jn allen sinen  
met haren wapenen die van binnen  
135 ende gereiden hen ter were  
jegen der jonvrowen here  
[T]vinteh ridder starc ende stout  
te sinen dinste ende tsire gewout  
hadde dese ridder jn allen tijt  
140 met hem; die jeste ende strijt  
ende orloge ende een wih sohten  
war dat sijt gevreischen mohten  
dese .xx. hebben hen doen wapen  
ende hare sarjante ende hare knapen  
145 ende sin comen opten mur  
ende sagen buten menegen gebur  
die gerne den casteel souden winnen  
nohtan waren die van binnen  
stout ende alle jn enen wille  
150 die van buten en lagen niet stille  
mar si sin comen met groter craht  
al scitende tote op die graht  
ende die van binnen scoten weder  
ende binnen desen so waser neder  
155 van stouten riddren ende van jongen  
en groet deel jnde graht gesprongen  
om te climmene toten mure  
mar si besochten aenture  
die hen te suar was ende te groet  
160 want men stac men warp men scoet  
op hen so sere. dor die noet  
dat die riddre van galistroet  
keren mosten vter graht  
ende binnen desen heftmen braht  
165 die vrowe dar ter seluer stat  
doe sise te gadre sah si bat  
datmen striest begaue  
tes si den suarten borhgraue  
gesprake. men doe sijt geboet  
170 doe hiet die vrowe van galistroet  
eischen den borhgraue. ende hi quam

opten mur dar hi vernam  
 dat banderside die vrowe stuet  
 hi sprac die stout was ende guet  
 175 ende ouermoder ende fir  
 sect mi vrowe wat dodir hir  
 met sulker here craht  
 vor mine borh ende hebt braht  
 al v volc. doe sprac die vrowe  
 180 ridder ic manv selp v trouwe  
 ende bi manscape die gi mi sijt  
 sculdeh. dat gi te derre tijt  
 walewain. mi leuert. ohte dan neen  
 jc sal vwe veste ende vwen steen  
 185 slihten. ende v ende hem verdoen  
 also mote mi genade doen  
 Tenlisten onse here god  
 die ridder sprac v tale es sod  
 ende houerdeh vtermaten  
 190 darombe moti achter laten  
 te done dis gi v vermet  
 jc wille oec dat gijt wale weet  
 heren. walewain. en wert v niet  
 ridder so sal v groet verdriet  
 195 dar af comen dat wet wale  
 want ic sect v sonder hale  
 van desen velde en keric meer  
 jne sal. v borh hebben eer  
 gesliht. bi gode van hemelrike  
 200 die ridder antwerde cortelike  
 dits algader dat gi mogt  
 eric. walewain. die grote dogt  
 bi betrouet. die valsheit dade  
 dat icken gaue in v genade  
 205 jc core eer datmen vt stake  
 min ogen beide. met derre sprake  
 es die vrowe van hem gesceden  
 ende geboet datmen gereiden  
 dade. mangen ende pedriren  
 210 ende men visirde jn wat maniren  
 datmen die borh gewonne irst  
 die heren die alre geerst  
 waren vander jonvrouwen here  
 om gingen den mur herentere  
 215 ende sagen wart hen dohte  
 nutlics wesen datmen mohte  
 mangen ende pedriren rihten  
 ende cortelicst den mur geslihten  
 met desen hebben si gewaht  
 220 tere stede war die graht  
 was ondieps ende die mur oec cranx  
 die vrowe ende hare volc sin suoren  
 datse nembermer en voren  
 vanden velde tuint no deel  
 225 sine souden eer hebben den casteel  
 gesliht. ende heren. walewain. gevaen  
 doe sprac die vrowe hets wel gedaen

datmense belihge tere stat  
 die heren spraken men mohte niet bat  
 230 stellen dan reht hiren jegen  
 doe des ouer een gedregen  
 dedemen tembermanne gude  
 comen. die met groten spude  
 die antsine gingen stellen  
 235 dar si den mur met souden vellen  
 bliden. mangan. ende pedriren  
 antsine menegertiren  
 ende enen casteel op vir sciuen  
 lopende. diemen mohte driuen  
 240 vort ende weder ende af ende an  
 hebben gemact die timberman  
 marsi timberden ende wrahten  
 vif dage. ende vif nahte eer sijt volbraten  
 wel te ponte. ende na sin reht  
 245 dat werc. ende dar toe ontboet men eht  
 die beste scuttre vanden lande  
 darmen den castel met mande  
 dar op vter sciuen geet  
 doe hi gemact was ende gereet  
 250 ende dar buten op dat velt  
 hare werc te ponte was gestelt  
 done was geen langer viren  
 met dede jnt here krijren  
 datmen assault hebben soude  
 255 ende men des anders dags woude  
 besuken die van binnen  
 degene die gerne souden winnen  
 pris ende ere die waren blide  
 ende gereiden hen ten stride  
 260 ende die van binnen banderside  
 si gingen ten mure in allen tide  
 ende waren ember op hare hude  
 dar ane dadense also die vrude  
 [D]at walsh doet ons verstaen  
 265 datter vrowen onderdaen  
 was therdeel van jngelant  
 hare rijcheit ende hare lant  
 ende hare mogentheit was groet  
 ende dat al behorde te galistroet  
 270 was hir nv comen metter vrowen  
 oec hadse dis mogdi mi getrouwen  
 ontboden man ende mage  
 so datter was te desen dage  
 versament meneh moderbaren  
 275 die alle vroe ende blide waren  
 dor datse die borh suken souden  
 beide die jonge metten ouden  
 daden hen wapenen sonder sparen  
 ende dosi alle gewapent waren  
 280 ende die vrowe van galistroet  
 dat here so scone sah ende so groet  
 wart si jn hogen ende blide  
 die van buten sohten met nide  
 tote vore die porte die van binnen  
 285 ende men ginc jn allen sinnen  
 jn wert werpen grote stene

al was die menege binnen clene  
jdoh werdensi hen ten mure  
so wel dat sere wart te sure  
290 den andren want sise nine verdrogen  
jc secgv dat sire menegen slogen  
die toten mure geclommen was  
dat hijs nembermer en genas  
si gingen houwen ende slaen  
295 ende her walewain. heft hem gedaen  
dar alre starcst was die wih  
hi sloger sulken die dor pris  
op was geclommen. dat hi weder  
wintelde al die graht neder.  
300 want hi geracten metten suerde  
dien dedi tumelen sonder houerde  
jnden bodem vander graht  
jc secgv dat her walewain. vaht  
so wel ende so ridderlike  
305 dat nieman dar en was sin gelike  
ende sine alle ontsagen soe  
dat elc blide was ende vroe  
wie dat hi hem die graht gerumde  
jc secgv dat dar meneh cuemde  
310 eer hi neder quam te gronde  
dat hi bejagde sulke wonde  
sine wart hem heel jn .xl. dagen  
nine hadmen hem van andren slagen  
gedint. hi hadde gnoh mesfaren  
315 alle degene die comen waren  
jnde graht die demen keren  
te haren lahtre ende tharen onneren  
[A]lse die van buten hadden gedaen  
dit pongis dat hem vergaen  
320 was te lahtre ende tonneren  
die daden manen die meste heren  
van alden here van galistroet  
tue saten die scone waren ende groet  
ende hebbense toten mure braht  
325 ende dar stont neuen op die graht  
die casteel die was gewraht  
op vir sciuen dar op lagen  
degene die te scitene plagen  
si scoten jnwert hare gescihte  
330 so datse vlogen so gedihte  
oht waren hagelstene  
dese scuttren allene  
heft die van binnen meer verladen  
dan alle dander antsine daden  
335 want si bescermden hare gesellen  
so wel dat si begonsten vellen  
ende af werpen ende te storen  
dat hordijs dat dar tevoren  
die van binnen hadden gemact  
340 ene mange groet ende wel geract  
die binnen dire vesten stoet  
dar en meester wijs ende vroet



geselle so latix v gewouden  
 en ware en trouwen jne weet  
 345 wient vromen sal eest v dus heet  
 die vehtinge jaet. ende jne sal  
 hebdi geual of ongeval  
 v. helpen niet van enen caue  
 gine connes oec niet comen aue  
 350 broder sprac her gariet  
 bi gode ende bi mire weet  
 jne onderwijns mi hedeme  
 wert v wale wert v wee  
 gi sult oec vehten sonder mi  
 355 min her walewain. sprac ende dat si  
 [D]een tue en consten niet gemaken  
 so wel den vrede. enne braken  
 ende en verworren vele mee  
 met harre talen dander tue  
 360 want elc die jonvrowe hebben wilde  
 dus es met spere ende met scilde  
 elc van andren en deel gesceden  
 nv was harde ernst hen beden  
 te jostirne redderlike  
 365 si hilden wel geteslike  
 vor hen die scilde ende daden springen  
 dorse disi met sporen duingen  
 ende reden beide vort met houerden  
 hoe gerne soude nv ter erden  
 370 elc andren steken of hi mohte  
 die ouermodege vrende brohte  
 enen starken esscenen scaht  
 ende stac met harde groter craht  
 heren walewaine. dor den scilt  
 375 wel een gelaht ende hine behilt  
 jnde hant cume ens voets lanc  
 vanden spere. want het spranc  
 te stucken ende al ontue  
 nohtan dedem merre wee  
 380 de steke die her walewain. stac  
 want hi hem scorde ende brac  
 den scilt ende den halsberh mede  
 hi heft sin ouermoedehheide  
 te sere becoht dis geloeft  
 385 die herssenen doenden hem jnt hoeft  
 ende dogen beide sin hem verkert  
 ende wart so sere tebarentert  
 dat hi breidel ende stegerep  
 ende cumelike gegrep  
 390 darscoen dari hem ane onthilt  
 dus lah hi jn sire ongewelt  
 gesteken ende heft hem jnt gereide  
 met pinen ende met arbeide  
 ende met groter craht onthouden  
 395 ende dose dorse keren souden  
 ende vergederen metten suerden  
 degene die vol was van houerden  
 tevoren ende van ouerdade

bat doe oetmodelike genade  
 400 ende seide. ay riddre edel here  
 want ic gequets ben harde sere  
 so spart mi heden op desen dah  
 ende sect mi oht wesen mah  
 vwen name jn houescheiden  
 405 sint dat gijs mi hebt gebeden  
 so willic dat v condeh si  
 min name. walewain. noemt men mi  
 doe antwerde die ridder hem  
 sidi her walewain. jaic ben  
 410 bi mire wet gi sect mi war  
 want v steke was mi so suar  
 dat hijs v es guet orconde  
 jc secgv dat mi vander stonde  
 dat ic irst ridderscaps plah  
 415 noit steke so sere en wah  
 hoe dul wasic dat ix v  
 nine vragde tirst. het ware nv  
 dese joste bleuen haddict geweten  
 yne hads mi jegen v niet vermeten  
 420 nv sect mi. wie sidi ontfaen  
 vter borh dar vore waren  
 gelegen die van galistroet  
 ende noh licgen. wonder groet  
 heft mi en trouwen van v beiden  
 425 hoe gi dus danen sijt gesceden  
 [H]er walewain. sprac en roke v niet  
 war ic vare ende hoe ic sciet  
 danen. wat geet des ane v  
 jc muet elre varen nv  
 430 jne mah hir niet op dit velt  
 lange wonen mar oh gi selt  
 dese jonvrowe quite laten  
 dat sect mi. ende vart vre straten  
 of dan neen. hoet v van mi  
 435 die ridder sprac. ic scelse vri  
 nempse ende vorse dart v vogt  
 doe sprac her walewain. mi genogt  
 vwen name te wetene. din segt mi  
 eer wi sceden. here dat si  
 440 jc hete teberge ende tedane  
 licoridon. met derre tale  
 sinsi beide van hem gesceden  
 ende liten her walewain. geleden  
 dart hem vogde die jonvrowe  
 445 die quite was van groten rouwe  
 ende tirst datsi henen waren  
 ginc die jonvrowe sonder sparen  
 tote heren walewain. dari stoet  
 die jonvrowe die houesh ende vroet  
 450 was. ende desconste vanden lande  
 si leide te gadre hare hande  
 ende sprac sute lief. edel here  
 gi hebt mi mine werelt ere  
 behouden hir ende min leuen  
 455 ende darbi willic v op geuen  
 lif ende guet jn v genaden  
 min her walewain. die houescher daden

gewone was. ende guder seden  
 plah hi eht sire houescheden  
 460 ende bete neder ende dede of  
 den helm. ende seide godelof  
 dat ic v hebbe jet liefs gedaen  
 scone jonvrowe. ende also saen  
 heft hise gehelst ende gecust  
 465 mine wondert niet dats hem lust  
 want hi was scone ende harde fin  
 hi duancse ane hem al luttelkin  
 ende dar die jonvrowe haren arm  
 om hem liet gaen wart hi al warm  
 470 want et noptene van binnen  
 dat irsten begin van harre minnen  
 [D]Ese magt was vtermaten scone  
 men vant doe onder semels crone  
 hars gelike te gere stede  
 475 war toe soudic hare lede  
 prisen elc van din besondren  
 al cortict v en darf niet wondren  
 want ic scuwen lange tale  
 die jonvrowe was gescepen wale  
 480 ende vanden hersenen toten teen  
 soene was ane haren let en geen  
 dat wesen mohte en tuint verscoent  
 en wart noit godinne gecroent  
 die hare van sconheiden geleec  
 485 bi hare scenense alle bleec  
 die met hare stonden ende gingen  
 darbi en constem niet beduingen  
 min her walewain. hine moeste an hare  
 sine minne lecgen. hine pinst alne ware  
 490 die jonvrowe no scone no rike  
 nohtan wildi gestadehlike  
 altoes bliuen ane hare minne  
 doe pensde hi jn sinen sinne  
 want hare minne heft een bat  
 495 gewermt so heet dat hi vergat  
 sins sels al wandire binnen baeden  
 sin herte die hem niet gestaden  
 ende die hem dit algader riet  
 warpen jn en groet verdriet  
 500 hi custe menehwarf die magt  
 ende darna heft hi gewagt  
 ende seide suster vwen name  
 wistic gerne wart v bequame  
 si sprac here ic hete ydaine  
 505 jonvrowe ydaine. ane walewaine.  
 hebdi enen getrouwen vrint  
 here des es noh onuerdint  
 nv sect mi liue suster min  
 oh gi jn v hertekin  
 510 met eneger minnen sijt geladen  
 here nenic niet bi gods genaden  
 jn onderwant mi noit eer minnen  
 en ware an v motix beginnen

al eest dat icker noit en plah  
 515 op dat ic v genogen mah  
 here nv heft v wonder groet  
 dat ic mi v biede aldus bloet  
 en darf nohtan. ic secgv tui  
 want gi hebt mine minne op mi  
 520 gewonnen met vre groter dogt  
 ende war gi henen vart gi mogt  
 mi met v voren hebt dijt so wert  
 dat gi mine geselschap begert  
 [S]cone jonvrowe jaic ic begare  
 525 v. geselschap war dat ic vare  
 ende god late mi sin gescent  
 onseidic dus sconen present  
 men mohte met mi wel houden scop  
 si sprac here ende ic geue mi op  
 530 tuwen gebode nv duet met mi  
 al v genade. ic hebbe hir bi  
 banderside an genen berge  
 ene winninge. dar wi die herberge  
 tauont te gader houden selen  
 535 gi mogt gerne des raets getelen  
 dat gi met vwen liue herberht  
 gi sult wel ende ongeert  
 slapen ende rusten dar  
 hi sprac jonvrowe gi sect war  
 540 so vare wi dar. doe houen si  
 die magt die cush was ende vri  
 op des selues ridders part  
 die dar doet geslegen wart  
 die met hare was meien comen  
 545 din licoridon hadde genomen  
 om haren wille dar ter stede  
 sin lijf ydaine hare helpen dede  
 op sin part ende begonste keren  
 tuswart weder metten heren  
 550 ende voren sprekende onder hen drien  
 dor dat forest dar si jn sien  
 blomen ende scone cruut  
 ende dar met menegerhande lut  
 die vogle waren harde gemalsh  
 555 ende ic geloefs oec vele te bet  
 dat die jonvrowe ende gariet  
 tegader voren side ane side  
 min her walewain. was harde blide  
 want hi was guets gevals jn wane  
 560 hi sah dicke op die wel gedane  
 met bliden ogen al dari reet  
 hare minne noptene gereet  
 want so hi die jonvrowe meer besah  
 sose hem op therte vaster lah  
 565 hare minne ende hare beduanc  
 hi mint ende hi weets guden danc  
 der minnen dat si hare met hare menct  
 hi trect an hem dat ane hem drenct  
 hi mint jn ernste ende niet te scerne

570 hi mint sere ende hi mint gerne  
hi lite hem sinken jndie minne  
dat hire jn baede ouer die kinne  
jn horde nie van ridder spreken  
die so sere wart onsteken  
575 jn corter wilen alse hi  
en ware niet sere en wondres mi  
want die jonvrowe was so scone  
dat hi gode vanden trone  
dancte dat hi noit gemacte  
580 so scone ende so wel geracte  
enege creature alse hare  
jc dar wel secgen oppenbare  
van mi seluen ene waret groet  
al logic siec tote op die doet  
585 war dat sulke jonvrowe quame  
ende mi jn haren arme name  
jc worder algader sonder  
hirbi en heues mi geen wonder  
dat hem sin herte jn hare ontsanc  
590 doe sine metten arme duanc  
mar nv alse bi hare reet  
ende hem sin oge altenen geet  
op hare. so wart hi so verdult  
ende met minnen soe verwlt  
595 dat hire jn vloide met alden leden  
aldus si te samen reden  
jnt wout haren vollen telt  
tes si quamen ane en velt  
dat breet was ende plajn  
600 doe sah min her walewain.  
enen sconen casteel dar staen  
die en breet lant hadde bevaen  
metten mure dire ombe ginc  
want hi was wijt ront alse en rinc  
605 dese casteel hiet langarde  
hi was gestiht dar op die varde  
ende opt sceden vanden lande  
bi hem was jegen die viande  
bescermt ende bereht dat lant  
610 hir ombe men hem den name vant  
lansgarde spreect jn walsche tale  
lant hude. nv wetti alle wale  
ho hi den name tirst gewan  
liflijc was hi te scouwen an  
615 alle die gene dine sagen  
min her walewain. began vragen  
sect mi liue susterkin  
wis es dese borh. here si es min  
niet mijn. mar onser beider  
620 want die mine en es v niet ongereider  
dan dues selues dat wet wale  
dus vorense met derre tale  
ende spraken alle drie te samen  
so lange datse te herberge quamen  
625 darmen hen diende houeschelike  
doe quamen knapen hastelike  
die scire ontvingen hare part  
ende leidense te stalle wart

ende hen daden ander knapen  
 630 binnen desen oec af hare wapen  
 dus dienmen heren walewaine.  
 houeschelike. doe sprac ydaine  
 toten drossate vander borh  
 venisoen ende vogle van riuren  
 635 ende vische van alre maniren  
 dat ons tauont nine gebreke  
 ende dat wi alle blideleke  
 mogen leuen ende met rasten  
 duet liue ende ere minen gasten  
 640 degene beweste vten woude  
 venisoen ende watmen hebben woude  
 dis haddense gnoh ende vele  
 dus satense met groten spele  
 bi ydainen dire jonvrowen  
 645 ende vergaten alles rouwen  
 [V]vat holpe dat ict macte lanc  
 menege spise ende meneh dranc  
 heftmen vor hen dis auons braht  
 ende al hars willen wel gewaht  
 650 nv sin die taflen op gedaen  
 doe was dar om en slapen gaen  
 gepogt want si sere begerden  
 jonvrowe ydaine hadde met houerden  
 tue scone bedden doen gereiden  
 655 dar die knapen bouen spreiden  
 tue couertore van goutdraden  
 ende slaplakene met clenen naden  
 darsi din naht op rusten souden  
 jonvrowe ydaine hadde oec gehouden  
 660 der sconster jonvrowen ene met hare  
 dat darric wel secgen oppenbare  
 diemen wiste jn eneh lant  
 die gafse gariete metter hant  
 hi dranc des auonsts oec ende at  
 665 met hare. jonvrowe ydaine bat  
 dat hi hars plage houeslike  
 want si ware edel ende rike  
 dus heft god dese tue beraden  
 si gingen slapen met genaden  
 670 ende hadden nv wel haren wille  
 mar licoridon en lah niet stille  
 die weh reet met groter craht  
 beide ouer dah ende ouer naht  
 ende nine virde vordat hi quam  
 675 jnt here dat hi sah ende vernam  
 die jonvrowe van galistroet  
 hi sprac jc mah v wonder groet  
 vertellen vrowe want ic sah heden  
 jn gene wout daric quam gereden  
 680 heren walewain. doe sprac die vrowe  
 gine daet. ic dede en trouwen

## Acr

- 682 [...]roet  
[...]et  
[...]ne
- 685 [...]ens niet tedone  
[...]ic wel  
[...]  
[...] vart  
[...]arden wart
- 690 [...]are ydaine  
[...] w]alewaine.  
[...]e wart  
[...]een part  
[...]e hare
- 695 [...]ware  
[...]el waren  
[...]varen  
[...]cachemert  
[...]ert
- 700 [...]ne sceen  
[...]en een  
[...]rf gecust  
[...]e nv rust  
[...]genaden
- 705 [...] verladen  
[...]e behouet  
[...]drouet  
[...]soht  
[...] mogt
- 710 [...] ic ware  
[...]l hare  
[...] so ic ben  
[...]m  
[...]nre tale
- 715 [...]e wale  
[...]en staen  
[...]euaen  
[...] helpe mi god  
[...]l sot
- 720 [...]t wale  
[...]e tale  
[...] orlof  
[...]it hof  
[...]garden
- 725 [...]rre varde  
[...]egert  
[...]rt  
[...]int  
[...]as blint
- 730 [...]t geslaen  
[...]heft gevaen  
[...]are stricke  
[...] dicke  
[...]miraude
- 735 [...] dicke craude  
[...]et  
[...] ouergeet

[...]ole  
 dat hi was gelijc den cole  
 740 die jnvireh es van binnen  
 also reet hi metter minnen  
 ouer al sin lief ontfunct  
 hi mint te sere nohtan donct  
 hem seluen dat hise niet en tuint  
 745 na hare werdehheit en mint  
 aldus reden dar dese drie  
 dort wout gine horet spreken nie  
 van merre joiën dan si dreuen  
 aldus quamen si beneuen  
 750 een forest darsi ontmoeten  
 enen coleman disi groten  
 ende her walewain. sprac hem an  
 sege mi seithi liue coleman  
 welc es die weh te cardole  
 755 degene kinde bat enen cole  
 dan den weh te houē wart  
 ay here bi mire langer vart  
 jne can v wel berihten niet  
 ende binnen desen om siet  
 760 her walewain. ende heft vernomen  
 enen knape lopende comen  
 met groter hast jn enen roc  
 die meesterlike brahte enen stoc  
 gedregen jnde rehte hant  
 765 hi quam lopende ende vant  
 heren walewain. ende sin geuarde  
 jn virwegesceden die op hare parde  
 hilden ende ontbeiden sins  
 her walewain. sprac. knape dins  
 770 beide wi hir dor dat du souts  
 den weh ons wisen ohtv wouts  
 te cardoel wart doe sprac tgarsoen  
 here dat salic gerne doen  
 en ware ic hebbe en luttel meer  
 775 met v te sprekene dat gi eer  
 horen sult genoget v  
 die suarte riddre heft mi nv  
 hir gesint ende gruet v sere  
 guet geluc ende werelt ere  
 780 geue god beide hem ende di  
 liue knape nv berihte mi  
 sal hi hem onthouden connen  
 des orlogs dat hi heft begonnen  
 tes ic jnt lant gekeren moge  
 785 die knape sprac om dat orloge  
 en dorfdi nember weder keren  
 die vrowe ende alle hoge heren  
 die vor onse borh gelegen waren  
 sin alle en weh gevaren  
 790 van hedemorgen vor dageraet  
 so keret al om desen raet  
 min here mi hir lopen hiet  
 dat gi vwen oem den .coninc. niet  
 en moiet. hine heft ende gene noet  
 795 vanden here van galistroet  
 want si alle gekert sin



doe seidi hem en luttelkin  
dat her walewain. wel bekinde

met desen li[t]tekene hi mi sinde  
 800 oh gi mi n[i]jet gelouen en wout  
 dat gijt nv ouer wareit hout  
 knape nv irst gelouix di  
 so guet litteken segt tu mi  
 dat ic andi no min no mere  
 805 en crufele nv sege dinen here  
 alse dune sies dat icken grote  
 ende dat god behoeden mote  
 ende wordi nembermer beuaen  
 jn node dat hijt mi late verstaen  
 810 jc quame hem te hulpen ende brohte  
 al dat ic geleisten mohte  
 nv wijst ons eer gi henen vart  
 den rehten weh te cardoel wart  
 her walewain. here. vart al desen  
 815 ende woudi oec te carlion wesen  
 so vart al dit gine mogt niet dolen  
 knape nv vare goden volen  
 wine hebben nember dins te done  
 dus sc[e]densi vanden garsone  
 820 ende reden haren vollen telt  
 dor dat wout ende ouer dat velt  
 ende hebben menegen berh oec leden  
 telest so quamense gereden  
 alst vespertijt was vanden dage  
 825 jn en groet bosh ane en hage  
 dat neder was ende harde dicke  
 dar redensi een lanc stucke  
 want hare weh der dore gelah  
 met desen her walewain. comen sah  
 830 enen knape. doe wart hi blide  
 gereden op en starc rosside  
 want hi woude ende begerde  
 hem te vragene om nimerde  
 ende alse hi hem was comen bi  
 835 sprac her walewain. knape sect mi  
 wanen gi comt ende war gi wilt  
 die knape die opt rosside hilt  
 antwerde heren. walewain. tehant  
 here ic come van duuelant  
 840 dar wasic ende lah te naht  
 die .coninc. heft met groter craht  
 gelegen wel virteh dage  
 noh sect mi knape dis ic v vrage  
 hets liht ohgis jet hebt vernomen  
 845 es dar jet nihtelinge comen  
 vorden .coninc. arture  
 enege vremde aenture  
 jaet gestermorgen te primetide  
 quam dar en bode die onblide  
 850 menegen macte ende sere storde  
 jnt hof. alse her walewain. dit horde  
 sprac hi knape nv sect mi  
 ho dat gescide ende war bi  
 here dar wart en mantel braht

855 dar grote nature ende grote craht  
 van wonderliker din[...]  
 alsic v oec vertellen [...]  
 alsic sah ende vernam  
 wat vrowen so den man[...]  
 860 om hare si was van[...]  
 datsi van andren rid[...]  
 meer begerden dan va[n ...]  
 dat wart hen allen [...]  
 condeh gnoh ende opp[...]  
 865 want hare ontcramp[p...]  
 so sere dat hi hare [...]  
 tote haren knien. di[...]  
 gescide vrowen ende jon[...]  
 dar mohtemen drou[...]  
 870 genouren. selue der [...]  
 want si souts tirst l[...]  
 ende doe die mantel cr[...]  
 hi ontcramp hare e[...]  
 tote jn midden haren[...]  
 875 darne was jonvrowe [...]  
 noh vrowe dijt ander[...]  
 die mantel en ontcramp[mp ...]  
 mar sulkermer ende su[...]  
 nadin dat elke jn h[...]  
 880 ongetrowe minne dr[...]  
 dar was sulc droue [...]  
 dar was alt hof jn [...]  
 mar die dar droue w[...]  
 dat was die .coninc. selu[...]  
 885 want si verloren alle h[...]  
 dor ere jonvrowen wi[...]  
 eens ridders hiet car[...]  
 amie. doe si den man[...]  
 jc seegv dat hi har[...]  
 890 tote op die erde jn [...]  
 dis was her caradon w[...]  
 ende sire amien wast [...]  
 doe sprac her walewain. sect m[i ...]  
 condi mi jet beriht[...]  
 895 welker dat hi dar cor[...]  
 here salic v der war[...]  
 so was hi corts her k[...]  
 hine sloh hare toten [...]  
 dat sine amie doe le[...]  
 900 her keie doe hare gev[...]  
 dat hare die mantel[...]  
 dat was wonder groe[t ...]  
 hi ware al verwoet v[...]  
 ende van torne hi wa[...]  
 905 met desen die knap[...]  
 ende sciet van heren w[alewaine ]  
 doe seidi guet lief.[...]  
 jc wilde wi beide ha[...]  
 gewest. sone haddix [...]  
 910 gine sout met harde groter ere  
 vorden .coninc. ende vor die heren  
 den mantel hebben gedregen

[...]  
915 die ydainen [...]  
her walewain. sprac. vor[...]